

STJÓRNARTÍÐINDI A 19 – 1998

20. mars 1998

453

Nr. 105

AUGLÝSING

um staðfesting handhafa valds forseta Íslands á reglugerð
um breytingu á reglugerð nr. 98/1993, fyrir Háskóla Íslands,
með áorðnum breytingum.

HANDHAFAR VALDS FORSETA ÍSLANDS

samkvæmt 8. gr. stjórnarskránnar

forsætisráðherra, forseti Alþingis og forseti Hæstaréttar,

gjöra kunnugt: Að vér samkvæmt tillögu menntamálaráðherra staðfestum eftirfarandi reglugerð um breytingu á reglugerð nr. 98/1993, fyrir Háskóla Íslands, með áorðnum breytingum:

1. gr.

19. gr. orðist svo:

Umsækjendur um prófessorsstarf, dósentstarf og lektorsstarf skulu láta fylgja umsókn sinni rækilega skýrslu um vísindastörf þau er þeir hafa unnið, ritsmíðar og rannsóknir, svo og námsferil sinn og störf. Með umsókninni skulu send eintök af vísindalegum ritum og ritgerðum umsækjenda, prentuðum og óprentuðum.

Skipa skal hverju sinni þriggja manna nefnd til þess að dæma um hæfi umsækjenda til að gegna starfinu. Háskólaráð skipar einn nefndarmann, menntamálaráðherra annan, en deild sú, sem kennarinn á að starfa við, hinn þriðja og er hann formaður nefndarinnar. Í nefnd þessa má skipa þá eina, sem lokið hafa háskólaprófi í hlutaðeigandi grein eða eru að öðru leyti viðurkenndir sérfræðingar á því sviði. Heimilt er að kveðja erlenda menn til starfa í dómnefnd.

Dómnefnd skal hraða störfum sínum eftir föngum, og skal hún að jafnaði hafa lokið störfum innan tveggja mánaða frá því er hún var skipuð í þeim tilvikum þegar umsækjendur eru tveir eða færri, þriggja mánaða þegar umsækjendur eru þrír eða fjórir, en fjögurra mánaða þegar umsækjendur eru fleiri en fjórir. Dómnefnd skal láta uppi rökstutt álit um það, hvort af vísindagildi rita umsækjanda og rannsókna, svo og námsferli hans, kennslu og öðrum störfum, megi ráða, að hann sé hæfur til að gegna embættinu. Álitsgerð nefndarinnar skal höfð til hliðsjónar, er starfið er veitt, og má engum manni veita prófessors-, dósent- eða lektorsstarf við háskólann, nema meirihluti nefndarinnar hafi látið í ljós það

álit, að hann sé hæfur til þess. Enn fremur skal leita álots hlutaðeigandi háskóladeildar um umsækjendur, og eiga fulltrúar stúdenta á deildarfundi þá ekki atkvæðisrétt.

Framangreind ákvæði skulu einnig gilda um skipun sérfræðinga við háskólastofnanir, nema að því leyti sem á annan veg er mælt í reglugerðum einstakra stofnana. Víkja má þó frá þessari tilhögun við veitingu starfs samkvæmt tillögu hlutaðeigandi stofnunar eða deildar, eftir því sem við á.

Heimilt er að flytja kennara úr lektorsstarfi í dósentsstarf. Deild eða námsbraut skal gera tillögu um slíkan framgang til háskólaráðs. Lektor, sem gegnt hefur starfi sínu í fimm ár, á rétt til þess að fjallað verði um framgang honum til handa í háskólaráði. Háskóladeild eða námsbraut er heimilt að leggja til við háskólaráð, að kennari í fullu starfi verði fluttur úr dósentsstarfi í prófessorsstarf. Með tillögu um framgang skal fylgja skriflegur rökstuðningur deildar eða námsbrautar svo og sams konar gögn og fylgja skulu umsóknum um laus störf. Slíka tillögu má bera fram þegar fimm ár eru liðin frá því að dósentinn var skipaður, settur eða ráðinn í fullt starf, eða fékk framgang úr lektorsstarfi. Við mat á starfstíma er heimilt að taka tillit til samsvarandi starfa dósentsins við aðra háskóla eða við rannsóknarstofnanir. Háskólaráð skal meta hvort umsókn um framgang dósents telst uppfylla umrætt tímaákvæði.

Skipa skal hverju sinni dómnefnd þriggja manna til þess að dæma um hæfi lektors eða dósents til þess að fá framgang. Um umsóknir, fylgigögn með þeim og meðferð þeirra, svo og um skipan dómnefnda og starfshætti þeirra skal farið eftir þeim reglum sem gilda um veitingu starfa háskólakennara eftir því sem við getur átt. Við mat á hæfi umsækjenda skal einnig farið eftir reglum sem gilda um veitingu starfa háskólakennara eftir því sem við getur átt, svo og reglum sem á hverjum tíma gilda um mat á hæfi samkvæmt framgangskerfi háskólakennara og um röðun þeirra í launakerfi háskólakennara. Um dómnefndarálit, efni þess og frágang, svo og um kynningu á því fyrir umsækjanda og meðferð athugasemda hans skal fara eftir þeim reglum sem gilda um veitingu starfa háskólakennara.

Þegar dómnefndarálit liggur fyrir í endanlegu horfi, skal málið lagt fyrir háskólaráð til afgreiðslu. Samþykki háskólaráð framgang manns úr lektorsstarfi í dósentsstarf, skal rektor falið að ganga frá ráðningu hans. Samþykki háskólaráð framgang manns úr dósentsstarfi í prófessorsstarf, skal gerð tillaga til menntamálaráðherra um ráðningu hans. Ekki er heimilt að samþykkja framgang manns í tiltekið starf, nema dómnefnd segi berum orðum, að hann sé hæfur til að gegna því.

Háskólaráði er heimilt að leggja til að forstöðumaður háskólastofnunar sé fluttur í prófessorsstarf. Skal þá farið eins að og um framgang dósents í prófessorsstarf að svo miklu leyti sem við getur átt.

Háskólaráði er heimilt, að svo miklu leyti sem það fer ekki í bága við ákvæði þessarar greinar, að setja starfsreglur fyrir dómnefndir er fjalla um framgang lektora í dósentsstörf eða framgang dósenta og forstöðumanna í prófessorsstörf. Reglur þessar skal birta starfsmönnum háskólans.

2. gr.

Reglugerð þessi sem er sett samkvæmt heimild í 40. gr. laga nr. 131/1990, um Háskóla Íslands, öðlast þegar gildi.

Gjört í Reykjavík, 20. mars 1998.

Davíð Oddsson.

Ólafur G. Einarsson.
(L. S.)

Pétur Kr. Hafstein.

Björn Bjarnason.